

# **KHUGA SADAR PRESBYTERY**

## **One Day Seminar**

**Amun : HQ, Tuibuang P.C**

### **Thupi : House Visit chungchang**

*~ Upa Tualzakap, Secretary Sr. KSP*

House visit thu i genkhawm na ding ua hin a pawimaw masapen enkhawm phawt hitiu in, a bawl dingdan leh pan lakkhawm ding dan genkhawm hitiu.

#### **House visit umzia :**

Kochuam hi thagau lam ah i hat leh machal thei na dinga chun kivethak/kivetua mun hi a ngai mama hi. Kochuam puitute hin i mipite hi ngaina tak leh hepita ah i vethak mun chun chau leh basam um te le hatna thak khatlawna leh machalna, kipumkhatna um ngei i na. Zia kivethakna(House visit) hi tawmngaitak ah i bawl thei na ding ah pawimaw mama chu i Lalpa Jesun a thawkit nung ah Peter kiang ah ala thu dawt hih a hi.

Jesu'n Peter kiangin "Simon Johan chapa, nangin ziate haw sangin lei hepi zaw em?" tin thumvei hial kinawn tak in a dawng hi. Zia gual ah thumvei hial kinawn tak ah ala dawt zia a chun Peter lungthim ana ta'n, "Lalpa, nangin bangkim la hia hen, ka hun ngaina'i tile la hiai", tin a dawnhu hi. Zia phat chun Lalpa'n, "Ka Belamte vak in", ti'n mawpuakna pawimaw tak ala pia ta a hi.(Johan 21:15-17)

Lalpa Belamte vak leh kaihuai ding chun a masapen ah Lalpa hepi a kul leh pawimaw mama ziakin, Lalpa'n Peter kiangin zia thu pawimaw tak, nang in kei lei hepi em? tin ala dawng khelkhel a hi. Kochuam puitute le Lalpa'n a kochuam/Belamte vak leh enkawl ding mawpuakna ei la pia'u hi, amasa Lalpa i hepi takzet ua chun a kochuam ngaina hitiu in vethak/kanthak(House visit) hi kipak tak leh thanuam takin mi sawl ngailo in bawl thei ding i hui. House visit hi thil haksatak ah i ngai ua, i hi ngachatlo ua chun, Lalpa i hepinu hi i kivel etthak kit uh ngai ina. Lalpa Belam i etkawl teu hi a gilkiad adangchak uh, adamlo lungngai uh, a taksap athawmhau uh hiatpiak di leh kantha a mamaw teu piak chu midang hilo in eimau kochuam puitute nasep ding chu a hi.

Adamlo lungngai lai uh leh anat asat lai ua, vetha bang lati nau em? ti ah thamuan a, pauchapna nei piak ah a kipiakna teu hiatpi ah pachatna i nei ua chun, a kipakna teu leh a thahat 'suthak kit intiu in Lalpa a dia mi phachuam mattak tak hung hithei ina'u. Zia chu kochuam machalna leh khantona bul hung hi ding a hi. Zia gual ah chu i vethak theilo ua ama maw teu i piak thei lo phat ua leh midangte thangaina, puitute muanzawlona ahung nei ua, sum leh pai lam ah taksapna, thagau lam ah taksapna ahung nei ua, kochuam kiakniamna bul a suak sek hi.

Lalpa Jesu'n "Kei Belampu pha ka hi. Belampu pha chun a Belamte a din a hinna a piat. Kei Belampu pha chu ka hin, ka Belamte chu ka hia, kei a te chun le keima ei hiau hi" atii. Johan 10:11, 14

Lalpa Belam i etkawlte a dia enkawltu pha, amau a dia i hun, i theina, inei ilam latngam a ngai a, a haksat a genthei nau leh ama maw teu i hiat a ngai a, amau inle ei hiat uh a ngai hi. Belam enkawltu hi ngal ah a Belam etkawlte helo, a Belam ten le a hiatlo Belam enkawltu chu lungkham um tak a hi.

Nang leh kei Lalpa'n a Belamte enkawl ding ah ei ngansiana ah i Belam etkawlte helo ah a mamaw teu pelo ah i matsua khak chun, Lalpa ma ang ah bang gen di i hi tau em? Lalpa Belamte i etkawl nau ah amamaw teu pia thei dingin Lalpa i hepi taktak nau em? i ki enchian thak in Lalpa kiangin dawn hitiu. Lalpa i hepi taktaklo ua chun Lalpa Belamte enkawl thei lo di i hui.

## **House visit bawlna ding ah pan i lakkhawm ding dan uh :**

1. Pastor ten Tentative Programme(zia hi bialfan masanga kochuam tin ah hawp ding a hi) phatak ah ahung bawl ua chun, Upate a ding ah le kisak lawkna phatak a um thei hi. Zia hun chuleh Upate lemchanglo ti um thei puana. Zia chu Pastor te leh Upa te House visit bawlna hun lemchang tak hi ding ahi. Pastor ten le a lemchang hun hun ua, Biakin kai khello in le Upa te tawh kihetua in a bawl thei tho uh a hi.
2. Pastor te a programme dungzui ua bialfang ah a chia phat ua leh madeu ah atun ua, Biakin kaima sang ah Upate tawh House visit a bawl thei ua chun Biakin kainuam lo leh kaikhalo ten le Biakin ahung kai khawlaw thei ui. Biakin kai masang ah a kimanlo tawp unle pelphat leh Upate tawh House visit a bawl thei ui.
3. Pastor ten Tentative programme ahung hawp uh i kochuam ahung tun phat leh Local Committee neikhawm a, House visit bawl ding dan feltak ah lemkuat na nei masak a pha'i. Tentative programme khello ah lemchang ah ahung phat ua leh le Upa ten House visit a lemchangchang in bawl pi thei zel leh hin pha mama ina.
4. Kochuam Upate i bial chiat ua thawlawm dawl ah i chia sek uhi House visit pawimaw tak ahi. Kochuam mipite haksatna, ataksap teu, a dinmun uh a lawtin nau hiatpi ah, pauchap piak leh pakchat lemchang pen ahi ziakin House visit bawl hi nasatak ah i ngai khawk uh a pawimaw mama hi.
5. House visit bawl hi Pastor te leh Upate ki suktha thaw theina leh sepkhawmna lemchang, kisawm dawltuana leh khiattuana pawimaw tak le ahi ziakin ngaikhawk a pawimaw hi.
6. Pastorte ahung phat leh Local Committee in arrangement a bawl manlo hial leh le Upa bial i nei chiat ua, i bial chiat ua House visit bawl hi a phai. Ahithe i liai chun Local Chairman/Secretary in a zui thei chun pha mama ina.
7. Kochuam Upaten i kochuam sung ah bial tin ah vethak ngai, panpi ngai i he chiat ua, zia te haw chu eimau in ila ve bep uh hilo in Pastorte hung phat leh vethak pi a pawimaw hi.
8. House visit form hi kochuam in kawln intin, Pastor te kitawnpi penpen in suai bawl intin, a nuailam ah kochuam Chairman/Secretary in suai a bawl ah Pastor inle a bawl ding a hi.
9. House visit bawl ding hi Dan guala kiphut ah i ngai ua chun haksa sa mama ding ihu a, kochuam pui-tute na Lalpa Belamte enkawltu te sep ding him ahi dan zawk hi geldaw ah i seplo uh chun a diklo zawk/hikhialtu i hidan hiat a poimaw hi.
10. House visit bawl hi ngaikhawk tak ah i gen zing lai in, a Inn chawt tam, vetam hi poimaw na chung in a tam lam kha a thupi pen hilo in a mite pui ah sawmdawl ah sukthathaw ah tilkho ah thamuan sak a poimaw ahi zawi ti geldaw zing hitiu.

*Form hi Sub-Pastoral Committee thathum dan ah a chut masang ngei ah piaklut zel hileh ti dawi a hi.*

## **Genkhawm ding :**

Zia a chung ah House visit bawlna ding ah pan lakkhawm ding dan i genkhawm nau apat hin apha zaw diak chiapi thei ding bang genkhawm ding i nei uh em? Genkhawm hitiu.

.....xXx.....